

سالم الحمداني

# سفح عمري

شعر شعبي عراقي

صدرت الطبعة الأولى في ديسمبر 2018

## بطاقة الكتاب

عنوان المؤلف : سفح عمرى  
المؤلف : سالم الحمدانى  
التصنيف : شعر شعبي عراقى  
رقم الإيداع : 25373 - 2018  
عدد الصفحات : 104 صفحة  
رقم الإصدار الداخلي: 308 طبعة أولى ديسمبر 2018  
تصميم الغلاف والإخراج : دار النيل والفرات للنشر والتوزيع  
جميع حقوق الطبع والنشر محفوظة للمؤلف، ولا يحق لأى دار نشر  
طبع ونشر وتوزيع الكتاب إلا بموافقة كتابية وموثقة من المؤلف

**دار النيل والفرات للنشر والتوزيع**

ثورة مصرية تشرق إبداعاً على الوطن العربي

رئيس مجلس الإدارة  
**ناجى عبد المنعم**



دار  
النيل والفرات  
للنشر والتوزيع  
أسسها الشاعر ناجى عبد المنعم  
حتم ٢٠١٧

رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572  
عضو عامل باتحاد الناشرين المصريين رقم 941 لسنة 2018  
هاتف: 01011256943 - 01116202218 - 01202541192 تليفاكس: 020554372901  
[alnilwaalfourat](https://www.facebook.com/alnilwaalfourat) [alnilwaalfourat@gmail.com](mailto:alnilwaalfourat@gmail.com)  
المقر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الـ 13 - عقار 304  
ج.م.ع. محافظة المنيا - أبو قرقاص - شرق الزعة - خلف محطة السكة الحديد - هاتف 086214428  
ج.م.ع. محافظة القليوبية - مركز طوخ - إيمى - هاتف 0132424735 (الغروب)

## الإهداء

الى ... المدينة الغافية تحت ظلال النخيل  
الى ... مهد صباي وطفولتي مدينتي سوق الشيوخ  
والى كل المحبين  
أهدي مجموعتي

# الشاعر في سطور



الشاعر سالم عواد جبر الحمداني  
الاسم الادبي : الشاعر سالم الحمداني  
تولد : ١٩٦٠  
السكن : ذي قار سوق الشيوخ

كتب الشعر منذ صباه سنة ١٩٧٦ واول ما كتب لون الابودية وتدرج الى كتابة القصيدة سنة ١٩٧٨ عندما كانت سوق الشيوخ مكتظة بدواوين الشعر فكان يحضر مجالس الادب والشعر في المدينة متأثرا باعمدتها ومنهم الشاعر ابو معيشي وثامر ال حمودة وحمدى الحمدي واخرين بعدها تاثر بعمالقة الحداثة والشعر ومنهم الشاعر عريان السيد خلف واسماعيل محمد اسماعيل ومظفر النواب وكاظم اسماعيل الكاطع واول بيت حفظته للراحل الكاطع

هو طريقين العمر  
واحد مذه ومزيلة تاريخ  
والثاني نصر  
واثنين يتلاكن ابلگ الگبر  
الرحمة للکاطع

وعندما دخل العراق افران الحرب ١٩٨٠ كتبت الكثير من  
القصائد الوطنية التي كانت في واجهة الملامة من اغلب الشعراء  
لأنني كنت  
اكتب ما يروق للعراق فقط

كنت عضو جمعية الشعراء فرع البصرة من سنة ١٩٨٢ حتى  
نقلت الى جمعية شعراء ذي قار سنة ١٩٨٦ مدينة الراحلان كاظم  
الركابي وكامل سواري وبقية المبدعين كنت في البصرة لانني  
عسكريا اما  
سكني هو سوق الشيوخ

بعدها سنة ١٩٨٨ انتقلت الى مدينة كركوك والسبب هو  
معارضة اخي الاديب والاعلامي الراحل باسم عواد لنظام صدام  
الدكتاتوري مما جعلنا نسكن كركوك بعد خروج اخي الراحل الى  
خارج العراق وانضمامه للمعارضة

هناك في كركوك التقيت بالشاعر الراحل نعيم الخباز والشاعر  
الراحل كامل العامري والشاعر الراحل جبار سمير والشاعر الراحل

عزيز الخزرجي من السماوة وشكلنا حينها جمعية الشعراء في كركوك بتواجد الشاعر هشام الحمداني و الشاعر المميز كريم الجنديل والشاعر نوفل الصافي والشاعر ناصر السماوي وجاء لنا تباعا الشعراء من جميع انحاء كركوك لنعلن جمعية كركوك للشعر واقامة الاماسي والمهرجانات ومنهم الشاعر المميز حاتم التكريتي والشاعر كريم العطشان ولا انسى دور الشاعر الراحل قاسم الشاوي من السماوة الذي اطلق فكرة الجمعية الاولى وتاسيسها شغلت منصب عضو هيئة ادارية لثلاث دورات وعضو التجمع الثقافي في سوق الشيوخ ومن مؤسسيه وعضو ملتقى الشعر الحر وعضو منتدى فيض المشاعر الادبي وعضو في تجمع الشعراء وكتاب الادب الشعبي المقر العام وعضو لجنة اختبار الشعراء في المركز العام ومسؤول شؤون المحافظات

لي عدد من المجاميع المخطوطة سترى النور قريبا  
مجموعة نثرية ( مدار رؤى )  
مجموعة ابودية (مشاحيف)  
مجموعة الفية الدارمي  
مجموعة شعر شعبي (خذ الماي)  
مجموعة نصوص غنائية (مواويل)

# المقدمة

بقلم

## الشاعر سالم الحمداني

من خلال التناقضات الاجتماعية والاقتصادية والتنوّر الروحي في العالم والكون عموماً ونتيجة لاستلاب وأنسحاق الذات تحت وطأة الصراعات الطبقية والمنازعات والمعارك والغزو انبثق الشعر الشعبي كضرورة اجتماعية لظرف تأريخي معيّن متضمناً انفعالات وهموم الانسان البسيط وطموحاته المشروعة وامانيه المؤجلة بعرق الكلمة المخضبة للعمال والفلاحين والكادحين الفقراء لتحكي صراعاتهم ضد الاقطاع وكل انواع الاستغلال يقول الشاعر الكبير ( ادونيس ) علي احمد سعيد في ديوان الشعر الشعبي ( لقد برز الى جانب شعر الحرب والاحداث التاريخية المتمثلة في اناشيد ومنظومات الحرب الشهيرة حيث يرتجز المقاتل ابياتاً من الشعر ويفخر بها وبنفسه وقومه حيث برز الشعر الشعبي العراقي الذي يتضمن ايدولوجيات سياسية احد اشكال الشعر الثوري ) ولصاحب الديوان يقول

الشعر نهر الحياة

المانشف فد يوم مايه

وآنه وانت ابهلنهر سفاته

نعتني الجملة اللطيفة

اللي يحلّله السهر

نصعد امتون القوافي  
من الشعر نظفر كصابب  
اجمل ما نلبسهه صور  
كتر الكال وكلت  
وغوص لعماق الحقيقه  
وصنع من الماكو يوجد  
خل يولي المستحيل  
اودور وي المايدور  
وكله دور وي الصحيح  
علمه اطباع المحبه  
وزيد بايات الصبر  
واليعاند عاتده ولا تستحي  
انطي كلمن طينته ابخده  
ولاتساوم

ان سياط الجور مهما خربت جلد الشعر الشعبي العراقي فان هذا  
الجلد يبقى مستقيما وعادلا كأسنان المشط مهما كانت الأفاعي تنهش  
عظامه اللينة وجلده الفضفاض فإنه يكتسي بجلد آخر كحلزون البحر  
يفجر ذاته من ذاته فالشعر الشعبي في العراق خاصة أكثر قدرة من  
غيره من الشعر العربي الشعبي الزجلي مثلا كتابات عبد الرحمن  
الابنودي وعبد الله النديم من تونس واحمد فؤاد نجم من مصر  
ومحمد بلخير من الجزائر ونوح ابراهيم من فلسطين وآخرين فلو  
وضعنا شعرهم في كفة والشعر الشعبي العراقي في كفة اخرى تبين  
رجحان الكفة العراقية في الالتزام والوعي والصورة ولصاحب  
الديوان يقول



--

احط روجي  
مهقه ابين يملك  
وجيبين بالهوه  
ادرغ ورضيك  
الشعر موش الشعر  
مسطر اخذ هاك  
القصيد السان  
من تنهد تبجيك

ولو تناولنا اللغة التي هي ظاهرة اجتماعية خطيرة لعبت دورا كبيرا في تطور المجتمع الانساني والانسان الفرد حيث هي الفكرة ومترجم الفكرة وهي واسطة تبادل الافكار ونقل الخبرة واساس المعرفة والتعارف ونقلة نوعية في التاريخ البشري في تطوره الثقافي والحضاري وصندوق التراث المعرفي في تواريخ الشعوب فان الرأي السائد عند الشعراء الشعبيين بأن الشعر الشعبي محترما موقفا وابداعا لا فرق بينه وبين الذين يكتبون الفصحى فالمساحات العربية الادبية فسحت المجال للشعر الشعبي والزجلي في الانتشار ونحن اهل الشعر واهل حرية الرأي نقف ضد مسيرته ونخاف على اللغة العربية من هرقل الجبار ( الشعر الشعبي ) ونضع الحواجز امامه وهذا ما نستنتج بانه حسدا لا غيره لكثرة متذوقيه وسامعيه وقارئيه

ولصاحب الديوان يقول --  
اركبك عالكب مفتاح

اشدّك حنجره الصوتي  
وشيلك عالمتن نيشان  
وفرّك لو يصح موتي

بعد هذا القول ان الشعر هذا الفن اللائق ذو الاثر العميق في تاريخ البشرية ضرورة اجتماعية وفنية بأي لغة كتب سواء كان في الانكليزية او الفرنسية او الروسية او الاسبانية او العربية الفصيحة او اللهجة الشعبية العامية والشعر هو عملية خلق فني جديد لوقائع وجدانية وعملية سامية بامواج متناغمة يرافقها ايقاعها السحري توقع السحر بكل عشقها فمن يلامس سحرها او يطلق لها العنان لاستقبالها يستمتع بها استمتاعا كبيرا  
كتب الشيخ جلال الحنفي حيث قال ( لقد كان الكثير من اهل الادب الفصيح ينظرون الى الانتاج الادبي العامي الشعبي المطبوع نظرة استخفاف ولو استطاعوا لمنعوا المطابع من طبع اي شيء من هذا القبيل ) هذا هو الموقف المجحف في الساحة الادبية العراقية الفصيحة باتجاه الشعر الشعبي بغض النظر عن الادب الشعبي ولو اخذنا مثلا للدول العربية المجاورة والاقليمية يؤخذ الشاعر شاعرا بموهبته فصيحاً كان ام شعبياً وهذا هو الموقف السليم اللامحاز ولهذا نجد الان كواقع فعلي ان اللغة الشعبية الاكثر قربا وتعبيرا عن هموم ابناء المجتمع بالمقارنة مع اللغة العربية الام ولو تفحصنا تاريخنا الادبي وخاصة صفحة الشعر العربي الفصيح تجد ان الامية لن تقف حائلا امام الموهبة الاصلية فسجل الشعراء الاميون قصائدهم البديعة واخذوا حيزهم بين الشعراء شعراء المعلقات فأن الشاعر طرفة بن العبد امي وبموهبته الفطرية سجل معلقته الذي يقول في مطلعها

لخولة اطلال ببرقة ثمهد  
تلوح كباقي الوشم في ظاهر اليد

والشاعر عنتر بن شداد العبسي هو امي وعبد في مجتمعات  
العبودية الاولى في الجزيرة العربية ثارت ثائرتة وانفعلت قدرته  
وموهبته فامسى شاعرا وفارسا حيث يقول في معلقته

هل غادر الشعراء من متردم  
ام هل عرفت الدار بعد توهم

نريد ان نبرهن هنا بان الموهبة لن تقتلها الامية او التعليم  
الناقص الذي هو ناتج من نواتج صراع الطبقات ونظامه والحكومات  
البرجوازية والرأسمالية ولهذا برز عندنا شعراء اميون قالوا القصيدة  
والموال والابونية وابدعوا وبقيت اسمائهم محفورة في ذاكرة الاجيال  
كالشاعر ابو معيشي وزاير الدويج هكذا سيبقى الشعر الشعبي يثور  
بين الحين والآخر لينشطر ليولد الجمال والفرح واللقاء والمدح  
والرثاء ليعلن الاستمتاع الابدی لمجتمع واعى ينتظر منه المزيد

-  
ولصاحب الديوان يقول -

انام الليل

جن طيفك

يمر رمشي خيال

انه سعفه ابنخله ميتة

من تشوفك  
تحيا وتكأك تعال

لو استقر فهمنا على ان القصيدة الشعبية السردية هي وحدة  
تركيب تامة الاداء باتجاه غاية فان شبه السردية هي وحدة متكاملة  
التركيب ايضا ان القصيدة الشعبية  
تحتوي على مفهوم التنوع والترغيب لنصل الى غاية دخول الفضاء  
الواسع المتراص اضافة الى المميزات التي تركز اليها القصيدة عند  
تقديمها وعلى الشاعر ان يوفر تركيب سردي تام فاعل في وحدات  
البناء الحديث لنسيج القصيدة على ان يثبت مقدمتها لتكون مبررا  
اوليا لما يتوخاه المتلقي من النص وعند التقديم تبرز ظاهرة التاثير  
الحكاوي الاخباري وقد يكاد الشاعر يخرج الى الحقيقة لينحو الى  
الفعل الصوري المتماسك كطاقة تحفيز اولية والابتعاد عن التصنع في  
كتابة النص ليضيف  
تماسكا ورونقا رائعا للنص

لاعود مرة ثانية ان اغلب الشعراء الفصحى بان الملاحظ ان  
الشعر الشعبي من وجهة نظرهم هو خصم ومنافس وذو مرتبة  
متدنية حيث لقي هذا النوع من الشعر اهمالا ومحاربة من قبل هؤلاء  
الشعراء والنقاد والدارسين والباحثين ان هذا التراث الضخم برز فيه  
شعراء وابدعوا ولو ان هذا التراث الذي تأكل شيئا فشيئا بقي  
واستمر الى يومنا هذا لاعطائنا صورة واضحة تساعد على دراسة  
احوال من سبقنا من الابداء والاجداد وكما ان من اسباب ضياعه  
وتاكله وانحساره داخل حدود اقليمية وتعرضه الى الزيادة والتغيير  
والتبديل وعدم توفر امكانيات الطباعة في غابر الزمان اضافة الى

ذلك لم يكن الحكام المتنفذون يولون اهتماما للشعر العامي الشعر الشعبي وجمعه وتدوينه لانه في رأيهم يمثل حالة شعب وليس الحاكم على عكس الشعر العربي الفصيح ولهذا فاننا لا نجد مخطوطات قديمة نبحت

عن هذا اللون من الشعر

ان الاستفادة من الشعر الشعبي يعتبر امرا غاية في الاهمية لدراسة ومعرفة احداث اجتماعية وتاريخية تعكس جزءا من سلوكية اسلافنا من الافراد لان الشاعر الشعبي اقل تكلفا من نظيره المتخصص في الشعر العربي الفصيح الذي غالبا ما يخاطب في اثاره واعماله طبقة معينة من الناس بينما نرى الشاعر الشعبي، يخاطب الجميع وهذا ما يجعله اكثر صدقا من غيره في التعبير عن اوضاع الناس ومعاناتها

لقد لاحظت من خلال دراستي للادب الشعبي وتصفح كثير من النصوص في الشعر الشعبي ان اللغة العامية او اللهجة المستخدمة في غالبيتها مفردات من اللغة العربية الفصحى لدرجة لا تصدق واصبحت على يقين ان الكلمات العامية هي لغة دارجة الا ما احتوت من الاعجمية اما التعبير الطارئ عليها فاما تغيير اللمعة او الطريقة ومن المعروف ان العراق عاش اكثر من سبعة قرون تحت سيطرة الاستعمار ساهمت هذه الفترة في دخول الكلمات التركية العثمانية والفارسية والهندية والانكليزية على خط اللغة العربية ولكن الامر اختلف منذ تاسيس الدولة العراقية وجعل اللغة العربية الفصحى اساس التعامل فبدات تختفي غالبية الكلمات التركية والفارسية والانكليزية الا القليل الذي دخل ضمن الشعر الشعبي ولو القينا نظرة

الى عبارة ماهية الشعر لتحدثنا عنها بانها عبارة عن نقل المتلقي الى ما وراء الواقع الى فضاء يستمتع به كثيرا وجعله يتابع النص بشغف كبير وحسب اعتقادي بان العراق ولود بالشعراء ولا يوجد في اي بلد عربي شعراء بهذه الكثرة والميزة فلا تخلوا منطقة او محلة او قرية او مدينة عراقية من شاعر كما ان اهل الفرات الاوسط والجنوب يمتازون بقريحة شعرية لا مثيل لها في العالم وهنا اريد ان استذكر شهادة العملاق نزار القباني في الشعر الشعبي العراقي يقول القباني

انا وشعري وادبي، اقف كالتمثال لببيت دارمي قالته امرأة من

جنوب العراق

اكيد في مدن جنوب العراق تنطلق الالسن بلا تكلف في الشعر والابداع كما قال، الاستاذ المرحوم علي الخاقاني  
ان الملاحظ في دراسة الادب الشعبي، في العراق ان هناك جوانب يجب ان تلاحظ بدقة

فان الشعر الشعبي العراقي نشا في الريف وامتاز بالصياغة والابداع والاتقان لفنونه عند انتقال ابناء الريف الى المدينة او العكس نشا امتزاج رائع من هذين العنصرين فكان يحوي سعة الخيال مع ليونة في السبك وان الشعر الشعبي هو في اكثر الابواب استمتاعا حيث يمتاز بايقاعاته الموسيقية الجذابة واسلوبه المميز عن باقي الفنون وله ارتباطاته الوثيقة بالشعر الفصيح والتفعيلة لانه ينتمي الى ميزان الذهب للفرايدي في جميع بحوره وله الوانه الكثيرة منها الموالم ويرجع الى البحر البسيط وكل انواع الموالم الرباعي والاعرج والسباعي والموحد والاسم والروضة والمقسوم اما النوع الثاني من

الشعر الشعبي الابوذية ويرجع الى البحر الوافر ومن انواعه المطلقة والروضة، والامثال والمقطعة والتاريخ والمقسوم والمسمى والخماسية والسباعية والمولة والمجارة والمشطر والزنجيل والعتابة والملحن اما النوع الاخر هو وزن الناييل ويرجع الى البحر البسيط ومن انواع الناييل الرباعي والرجدي والسباعي والركبانية والمثن ومن الانواع الاخرى السريع والميمر والمجرشة والتجلية والموشح الذي يقسم الى موشح جناس، ومطلق سائب وابو الهات واندلسي من قافيتين ويستمر قطار الاوزان بالاوزان المركبة من تفعيلتين المبتكرة من قبل شعراء لهم باعهم الطويل في دراسة الشعر الشعبي منهم المرحوم قيس البناء وعيدان الجصاني وعزيز الخرجي ومنهم على قيد الحياة ربيع الشمري وعادل العرداوي ومن الاوزان المبتكرة وزن الشموس والطويل والورد والبحراني والمفتون وخدري الجاي وحمام يلي والحدي والنعي بين الحمولة والمنسجم والشبكها وازريزر والفانزي والجملة ونص وعزيز الروح والعيلي وخايف عليها وانا فتحنا والمترادف والكصيد والاهجيني والملمع والنصاري وجميع هذه الالوان تنسج لنا منارات واحاسيس نستمتع بها جميعا لتطلق حركة التجديد للقصيدة الشعبية العراقية وهي ظاهرة ذات روابط متينة متعددة مع كل التمحضات والتجاوزات في فنون الادب الاخرى وكانت القصيدة تعاني وبشكل خانق من مرض الشيخوخة والركود في ستينات القرن الماضي اترواح كههل واشكالها التقليدية وكنتيجة حتمية متمشية مع متطلبات المرحلة فبرز في تلك الحقبة الزمنية شعراء يبحثون عن لباس جديد للقصيدة الشعبية ومنهم الكبير مظفر النواب وجاء من بعده عريان السيد خلف وكاظم اسماعيل الكاطع واسماعيل محمد اسماعيل وشاكر السماوي مبتكر الومضة في الشعر الشعبي واخرين لهم الفضل الكبير في نقل القصيدة الشعبية من الكلاسيكية الى الحداثة لتصل الى اوج

عظمتها، في سبعينات القرن الماضي الذي اطلق على هذه المرحلة بالعصر الذهبي للقصيدة الشعبية العراقية وعلينا ان نبرهن والذي لا يختلف اثنان بانه مؤسس المدرسة الحديثة للشعر الشعبي العراقي واحد اعمدها، هو الشاعر الكبير مظفر النواب الذي ابدع في حداثة المفردة ان الاساس الذي تقوم عليه الدراسات الادبية والنقدية في مجال تخصصها لان محورها الاساسي تبني عليه ابحاث علم الجمال والتذوق للشعر وصوره  
في ناتج العملية الابداعية

ان التذوق والنقد والحكم لا يقوم الفعل الابداعي الا نتيجة الاليات وعوامل عدة منها نفسية وبإلوجية تحدث داخل الشاعر الذي ينبغي عليه الالتزام بها اذ يبدو دافع خلاق لينفرد العمل او تنفرد الفكرة المحاطة بسحرية مطلقة لكن ما ان بتجاسر هذا الدافع للظهور بعد ان يمتلك الجراة حتى يجد نفسه واقعا في شبكة منسوجة من الضروريات الشكلية لقد تحسس الشاعر الشعبي باصابع مرهفة كل الخشونات الخارجة فكتب القصيدة الثورية مشحونة بعاطفة وانفاس عاشقة اذ كان يجمع بين الحب نحو الفرد الى الحب نحو الجميع ومن هذا تكونت في القصيدة عناصر قابلة للنمو بسبب ان الفرد والمجتمع وعوامل جميعها هي الاخرى قابلة للنمو وفي تطور مستمر منذ ثوريات السيد عذافه وغزل الحاج زاير وقصائد زاهد محمد في اربعينيات

القرن الماضي



# نهر للحياة

الشعر  
نهر الحياة  
المانشف  
فد يوم مايه  
وآنه وانت  
ابهلنهر سفاته  
نعتي الجلمه  
اللطيقة  
اللي يكحلها السفر  
نصعد امتون القوافي  
من الشعر  
نظفر كصايب  
اجمل ما نلبسهه  
صور  
كثر الكال وگلت  
او غوص  
لعماق الحقيقه  
وصنع من الماكو  
يوجد  
خل يولي  
المستحيل

ودور وي المايدور  
وگله دور  
وي الصحيح  
علمه اطباع المحبه  
وزيد بايات الصبر  
واليعانده  
عائده ولا تستحي  
انطي كلمن  
طينته ابخده  
ولا تساوم

# المدينة الشاعرة

يا أول درس  
من يحلم الانسان  
ويا أول حرف  
منطوق بلساني  
يا أول حضاره  
اتوزع التاريخ  
يادم اليعارك  
وسط شرياني  
يا أول اصبع  
من عزف للناس  
ياقنثاره منج  
هاي الحاني  
ياسيف اعله اسمج  
هدل الذرعان  
لهسه اصوابه  
منه اتعاني عدواني  
ولهسه اسمج  
يفرز ناصر السعدون  
لأن الناصريه  
يگول عنواني  
محتاره الشمس

من تصبح اعله الناس  
لأن خطت بديهه  
ابيوم الواني  
ياروج الفرات  
اكتابه من تقراه  
عجني وبيده  
رد انوب سواني  
للبدعه مشيت  
وخذت روحي وياي  
لن الطور  
صاح ابصوت بچاني  
وشفت ستار  
گاعد منتجي  
اعله الريح  
نشدته اوگال  
انه امتاني صحباني  
كررت السؤال  
وزعل چنه اوياي  
صاح ابصوت  
مدري اشلون سماني  
( ورد للناصرية اردود مخنوك ابالف عبره )  
لن زامل  
تلگاني يگلّي اشبيك  
للمگيرقراهه

ابسرعه صحّاني  
بين الزحمة  
وصفوف المحطات  
ركبت الذكريات  
أوفرت احضاني  
اجاني الليل  
فار ش بالسمة ابساط  
ملتّمه النجوم  
اعليه وتاني  
(يانجمه عونج يانجمه  
عونج يانجمه)  
لن حسين نعمه  
ابصدري لاگاني  
شایل ذكرياته  
ابدفترا الأشعار  
وعيون الركابي  
المالهنّ ثاني  
من داخل حسن  
سمعني أجمل طور  
اتمايل غصن  
للصوت خلاني  
يحضيري بطل النوح  
بسته اتصير  
بالمشحوف

وسط الهور وداني  
شبتت حسين  
ودموع القوافي اتكوم  
چنت بردان  
بس ابصوته دفاني  
( ياهور الجبايش لاتسد الشط )  
صارت كهوه طعمه  
ابوسط فنجاني  
( طول ياطريج السوك ريت ادري — )  
ولك واكف مجيد  
وابد لا ميموت  
يعرفه القاصي والداني  
وصلت السوك  
صدك والطريق ابعيد  
لان هذا الكلب  
عالشوفه وازاني  
المضيف الصار  
عالشط والابوذيات  
هنه امعزيات  
ايحلن الساني  
ابومعشي فرشهين  
لليجي خطر  
ومن ينگد احس  
ابگستي باساني

الشوارع وكفّه  
غام يصفك التاريخ  
لال حيدر من وصلنه  
الباب حاجاني  
الشعر من مستحاته  
اشواك غام يدور  
وشتل روحه قصايد  
فوك وجداني  
وجت مكتبة حمدي  
اترحب الخطار  
وعيون القصايد  
سحر ربّاني  
هاي الناصريه  
الصفّت بستان  
اوناعور الأبداع  
الترس بستانني  
الشعر عدهه  
مساحي  
اتقاتل العدوان  
لو واحد يريد  
ايحْتَفّ ارداني

## الهُوَامِش

ياسيف/ معركة ذي قار  
ناصر السعدون / ناصر الاشقر السعدون مؤسس مدينة الناصرية  
محتاره الشمس / عندما تتخلل اشعة الشمس زقورة اور في بلاد  
سومر يتحلل اللون الذهبي لاشعة الشمس الى اللون الاحمر اذن  
اكتشاف الالوان في مدينة الناصرية راجع حضارة بلاد سومر  
البدعة / احدى قصبات مدينة الشطره التي تميزت بجمالها لوقوعها  
على نهر دجلة وملتقى للادباء والشعراء والفنانين  
ستار / هو المطرب المبدع الذي يمتلك صوت ريفي دافىء جمع بين  
الريف والمدينة وابن المطرب جبار ونيسه توفي في  
الشطره اثر حادث مؤسف وحزن الناس عليه كثيرا  
زامل / هو الشاعر زامل سعيد فتاح الترك ولد ومات في الناصرية  
اثر حادث مؤسف  
وصاحب اغنية المغير التي غناها المطرب ياس خضر الذي غنى له  
الكثير من الأغاني  
حسين نعمه / وهو الفنان حسين نعمه من مدينه الناصرية  
ومن اشهر مطربيها  
الركابي / هو الشاعر كاظم چرداغ الركابي ولد ومات  
في الناصرية كتب اغنية (يانجمة ) للفنان حسين  
نعمه  
داخل حسن / هو المطرب المرحوم المعروف داخل حسن ولد ومات  
في الناصرية  
حضيرى / هو المطرب حضيرى ابو عزيز ولد ومات في الناصرية  
سمى بأبو عزيز لأنه كان يتعزز عندما يطلب اليه ان يغني خجلا ام  
كبرياء



مجيد / هو الشاعر المرحوم مجيد جاسم الخيون ولد  
ومات في الجبايش صاحب اشهر القصائد ( ياهور  
الجبائش ) ( طريق السوك)  
ابو معيشي / هو الشاعر جمعه ابو معيشي الشمري ولد و مات  
في سوق الشيوخ كتب اروع ما تتصور في الابودية مات وهو لا  
يعرف القراءة والكتابة  
ال حيدر / عائلة ادبية من مدينة سوق الشيوخ اخر ما توفي من  
العائلة الاديب جميل حيدر الذي يضم منزله مكتبة كبيرة يرتادها كبار  
الشعراء والادباء من المدينة  
حمدي / هو الشاعر المعروف حمدي الحمدي ولد و مات في مدينة  
سوق الشيوخ  
( حصاريات وظلم الطغاة 1994 )

# نذر مذبوح

زندي  
أعله زندك  
يانذر مذبوح  
ما فك الحزن  
كبره  
وعبر بالدرب  
وجدامي بيه  
أغوص  
لجل عيون  
وجهك  
تثبت أبصدره  
أحس  
كاعك أجدام  
ومحطة ريح  
طوت  
ليل المحاجي  
وصامت العشره  
يتاريخ الكوارث  
وين فجرك وين  
ترس  
أجفوف أيدك

تملي من صبره  
سرجت  
أعله الشمس  
من دون داعي  
وخوف  
شربت أفرح كله  
ولا بكت كطره  
وتنام  
اعيون كل هاي  
الحياة  
ظل كأعد  
بجينه  
يفرز النائم  
نسل من عمق  
الحقيقه  
أبيوت هاي الناس  
ركن حيله أبظلام  
وظل شبح كايم  
ظل جرحه جبير  
ايراف الجرحين  
هز ايد نهر  
للنايبه اودايم  
يهلنايم يهلنايم  
فصل تاج عمرك

من كلب هايم  
حَطَّ أيدك  
أبگصتي وفوت  
ليجدام  
ورضع  
من سمه ألسابع  
حليبك  
لا تظل صايم  
أالصخر ترجملي  
عمره  
والشمس  
صارت غريبه  
والبواچي  
شلون ما تمضي  
أعله باچر  
هيّ هيّ  
ومو عجيبه  
مو عدي  
ما كعد غبشه  
وماندهني أعله  
ألمصيبه  
ضاگت ويصغر  
حجمه  
أشمتعلي الشمس

ما تصبح جريبه  
الموت ما يثمر حياة  
والجوع ما يثمر خبز  
بس عجيبه  
الغاع تولد  
بعد مده أتصيح  
هدوني غريبه  
عالطريق أنصيح  
فرحانين ما همته  
الدمع  
والشفاف  
وي نبض قلبك  
تنام وتنسمع  
والحروف الضاويه  
صارت ظلام  
والظلام أبلا ضوه  
ما ينبلع  
يلشتلت الحزن  
شجره من صنوبر  
حضن گاعه  
وأبد ما ينشلع  
خذني طير  
أبوادي عرسك  
خذني ضحكه

من شمع  
خزني شفته  
تيهت منها ابتسامه  
ابلا سنع  
آنه أشوفك طيف  
وي موسم ربيعي  
بس عجيبه  
وي السعاده  
أثنيكم ما چن ربع  
شارع المتنبی

# عين الزمان

عند سماعي خبر اغتيال شارع المتنبي قررت ان اتيمم برماد  
الكتب المحروقة بنيران اللاوعي لعدم وجود الايدي الامينة للحفاظ  
على خزانة الثقافة العراقية  
الى ... روح الشارع  
روح القضية  
روح الحكومة

ياوجه العراق  
المستحي من الناس  
مد طولله اعله طولله  
يفردش ابروچه  
يا الله وكبر  
من شفت بلواك  
جرحياكل ابجرحه  
وتاكله اجروجه  
احس عين القلم  
حكمة سماء اتصير  
لأن  
خلّص دمعهم  
وتشتهي النوحه  
موشارع  
لان استهدفوك اليوم

لان زادك لذيد  
اوزايد املوحه  
يامالىء الدنيه  
وشاغل انت الناس  
ولا لوحه  
ويگلك احرك اللوحه  
لان بيك الوعي  
التف وقلم من صار  
رفع چف البناء  
ورمم اسطوحه  
اذن انطوك  
طرمه الاذن ماسمعوك  
حتى اتصير  
الهم خوش مرجوحه  
يا چف الصبح  
اغسل وجه بغداد  
سد بيبان حزنك  
ليش مفتوحه  
احنه تشما يصير  
انگول هذا ارهاب  
ونخلي السبب  
ياكل سبب روجه  
موكافي ارتعش  
وجه الصبح زعلان



ذب ضيمه اعله ضيمه  
وروحه مذبوحه  
الشوارع وكفه اجت  
تتقدم التاريخ  
وكتبه اعله الحروف  
الغب ممسوحه  
وحلگ القاهره  
ماباس خد بيروت  
لأن عين الزمان  
ابخل مشبوحه  
كبرنه اويك  
عين ابعين متحدين  
اشما تكبر  
تجدد سرك اتبوحه  
ولا مليت لحظه  
واقره بيك الشوف  
يوميه اشوفك  
تنتج اطروحه  
كلب عندك عراقي  
الگاع تتلگاك  
سمه ابداعك سماء  
ومحد يلوحه  
يا غلطة سياسه  
ارماد فوك العين

يا ملة تعدد  
مله مسموحه  
لان هذا الوزير  
ايصير ند وياي  
اكتل الناس عمداً  
وحرگ ابروحه  
( اذا اتتك مذمة من ناقص  
فهي الشهادة لي باني كامل )  
ابو الطيب

## علمنه المعلم

اعلن للصدور  
الواكفه اجنحات  
وابجلك السري  
شلون تطوه  
وشهد للعراق  
اللزم چف الريح  
واتلوح مذابح  
ما رضت تهوه  
يحگ الله الضماير  
بييه نفخ الريح  
من غم الضمير  
الما يمد دلوه  
العنده اعيون  
المن ضامهن للموت  
الى يوم القيامة  
ما اظن يسوه  
لأن احساب  
دنيا وآخره الترضيك  
ورضي الله ابحياتك  
وحسب الخطوه  
علمنه المعلم

للوطن ابواب  
يا باب الندخلة  
ينحسب صفه  
وعلمنه الوطن  
مو بالخريطه يگوم  
علمنه الوطن  
سهران ما يغفه  
يتاريخ الكرامه  
اشويه ارجع ميل  
هز طرف العراقي  
ولا تهز جتفه  
لان منهم عليه  
كلنه خلله الريح  
ما تگدر وجهه  
وماينه انتشفه  
لحد الآن ياتشرين  
بيك اصوات  
تنادي والعرب  
بفعاله اتوصفه  
ولحد الآن  
اشتم ريحتك گهوه  
ورفيف الدم على چفوفي  
محد يگدر ينشفه  
ولحد الآن

دمشق امكحله ابارود  
طگ الفشك  
طگ الفشك ما يغفه  
ولحد الآن  
من اتمر على السوري  
يدنگ يستحي  
ويفرشلك الشطفه  
الك هذا العراق الصاح  
صاح ابصوت وبلهفه  
الك مرعد ثيابه  
وگال ياوسفه  
العمام الماتشيل الراس  
تهيل الخابط وتصفه  
العمام الماتحرك ايد  
بيام المحن صلفه  
مو كافي زعلنه  
اتشكين اعله الروس  
طگ عين اليمين  
ولازم انگطفه  
حسبنه اخوان  
دم البينه بيكم دار  
من صارت ارضكم  
للعدو سعه  
شكلنه الوريد

ومن كلب بغداد  
دغات الكلب  
هالوكفن نزفه  
مو رد الضمير  
يريد عشر اضعاف  
بزيتو اعله جرحه  
وعينكم صلفه  
يلبعغو الضمير  
ابسوگ ارخص سوگ  
ساومتو اعله دمنه  
وضاعت العرفه  
اجيتو ابلا ضمير  
ولابسین الخوف  
من وجهه الجبان  
المستحه يشطفه  
-نقارع المسافة التي بيننا  
لكي نرتب الفضاء الذي انت  
فيه يا عراق-

## سَفْحَ عَمْرِي

سَفْحَ عَمْرِي  
دَمْعَ بَسْ  
مَا شَكَيْتَ الْحَالِ  
أَتَوَضَّعُ أَبْذَمَعْتَهُ  
أَوْاطَلْبُ الرَّحْمَةَ  
وَلَحِظْهُ أَتَجِيبُ  
لَحِظْهُ  
وَتَطْلُغُ السَّاعَاتِ  
وَعَلَى خَفِّ الْجَدَمِ  
مَا تَنْطِي كُلَّ لَزْمَةٍ  
أَضِيعَنَّ مَرَّةً وَرَدَهُ  
أَوْاشْتَلِ الْبُوسَاتِ  
وَمَنْ كَثُرَ الْكَتَرُ  
دَوَامَتِي أَمْسَلْمَهُ  
أَتَعَبُ وَالتَّعَبُ  
لِلرَّوْحِ رَاحَةٌ بِالِ  
أَحْدِيثِهِ  
أَوْجَفْهُ مَعْضَدُ  
لِلْسَمَةِ أَوْنَجْمَهُ  
تَضِيعُ أَيْلًا وَعَدُ  
شَوْغَةٍ جَرَحَ بِهَدَايِ

ومن تكشف وضعه  
تنقلب بسمة  
غادرت الظلام  
امناوش ابلا حيل  
على الساني الفرح  
بس داخلي امهزمه  
التقيتك يازمن  
عمر اوسفح مخنوگ  
من ينهض  
تغلبه الكبوه والقسمه  
مشيتك درب  
خانگ هدوة الليل  
لگيتك سيف باشط  
ذابح النسمة  
اذا درب الشمس  
معروف عند الناس  
اوكلمن نده واضح  
حاضر الخصمه  
انا خصمي  
الهوه والليل والمويل  
كلمن طالب ابحصته  
او عزل سهمه  
مو بيه الغلط  
وترس اجيوبي اغلاط



اطوش  
اغلاط غيري  
اوارفع الزحمه  
اشتلحگ بعد  
مو مايل البنيان  
اذا چفك يعدله  
او غيرك ايهدمه  
امراشگ بالتريده  
ايصير ما ملحوگ  
على يادچّه التحطّه  
محد ايرحمه  
على صبره اليعبي  
يا ضمير يگوم  
اوضماير ولده  
تنهش بيه وتشتمه  
نعرف بللي يخدم جيش  
يطلع يوم  
اوجاباهه العراق  
من المهد خدمه  
استباحث بيه  
حتى الماتعرف البوح  
على مود الفلوس  
اتگوم وتصدمه  
البعض ياكل ابعضه

اوشاهد الجتال  
يصنع موت شعبي  
ابشعبي ويقدمه  
يبعثر بالمنايه  
ابغير داعي وخوف  
يتخير اخيار  
ويضبط ابزمه  
مو كافي ارتعش  
وجه الصبح زعلان  
انكلب  
كله اعله كله  
يجالع ابسمه  
من شاف الدم  
على الحيطان مرسوم  
وجه يضحك عراقي  
اوجه بي ورمه

# أصعب درس

باختصار  
انذار الشراع  
شلون ما يندار  
من جان الجمر  
ينفخ ابخلگ النار  
علمنه الوطن  
بعيون تعبانات  
نغسل كل حزنه  
ابدمعة المحتار  
وآنه وياك  
هسه ابلا فكر ولسان  
لأن قفلت سمانه  
وشاءت الأقدار  
باختصار  
خلونه نسولف  
عالمضه والصار  
عطشانه الريح جبناهه  
اعله وجهك ليش  
لأن سفاته  
اتشلبه اعله متتك طين  
نعرف زين

خل ندفع ثمنه انطیح  
بس انگوم  
لو رادت تجرّب زين  
السكته ما تظل سكته  
وتنگلب لیل  
لجل عينك ياوطن  
نفديك هاي العين  
ونعرف بالصعد  
درجك بلا قانون  
كلّش زين ندري انشوف  
وضعك زين  
والعينه صلفه  
تنفّس والله لازم يوم  
وتبين الحقيقه  
وتتكشف بعيدين  
وهاي منين  
اجتنه ما تكلّي منين  
صار اصعب درس  
واقلامنه التناخاه  
وانرهم الجواب  
ابلا وعي وتفطين  
خليهه البواحي  
التمضي تبجي عليك  
بلكت تنگلب باجر مواعين

واحنه انذور الهه  
ويحمي كل تنور  
مثل ما دارت الدنيا  
وعكست وي حسين  
بس فصل جوابك  
وطرح المنبوذ  
تلغه الدنيا بيدك  
روح تسبك روح  
والمذبوح هذا اليوم  
هذا اليوم مايّلام  
لأن مرّه ظلام  
وضوه المامسموح  
لأن حگه الضمير  
الصعد شهگة عيد  
ابنفس سچين بيته  
ينطرح مذبوح  
الوطن دشداشته  
رگدت فرد نوب  
خلينه نفصل  
عدنه تفصاله  
الوطن نخله ومدينه  
وشارع ومصباح  
الوطن احنه الوطن  
ونمئل اعياله

نلم چلمه اعله چلمه  
انصير نار ونور  
ونرسمه من الجنوب انعّـل اشماله  
الهوه نفس الهوه  
والناس نفس الناس  
الجبل شط العرب  
مكتوب ودّاله

# نزيف الدم

من عين القلق  
ابچيلك اولايات  
بالعهه الحزن  
تمثال من شلته  
على الضيم اللبس  
دشداشه ما ترّاف  
ومبينه العيوب  
البیه فاضحته  
من كثر الذبح  
سچينه بيه اتبيج  
والسقان صافن  
خلسته السكته  
المطر ينزل مطر  
يندار وجه الغاع  
ويبدل الثوب  
الگبل لابسته  
اوهاي اسنين مرّ  
والوطن مثلوم  
يابخت الحكومه  
انصيح ثالمته  
وانت يابشر

# مگلوب گلی اشبیک

وَأَنَّهُ بِسْمَرْتِهِ

## نزيف الدم

یتجہ اعلہ روحہ

## الغيره ماخذته

## گائنه الوطن

## مو پيه بس نهرين

## اجروحي اعله الخريطه

## الوطن صابغته

## حط چفہ العراق

## اشکبره چف الخير

طلع جو عان

## ابنه الغرب ماكلته

## تسلمته الحرب

## لعابه بيد اطفال

## كبرت وي عمرنه

## الفرح بايگته

## مثل عمر الدجاج

## اعمارنه من انموت

إذا مو بالذبح

## بچفوف خانگتہ

## خلصنه وظل عليه



العید بس یفوت  
یحزن من یمرنه  
البچیہ حاصرته  
اذکر یاوطن  
من چان ابوی یگول  
ذاکرتی من امس  
للیوم حافظته  
الوطن عصابتک امک  
یبني خاف اطيح  
مد روحک جسر  
وجاوز الصنته  
الجبيل باقی ابمچانه  
ما تعیر يوم  
موش ابل مچان  
الگاع شایلته  
اثبت لا تهزک  
فشخه المصدوم  
یوجر بیک باول  
تالی فاشخته  
اوفتش عیونک  
من یمر هه اللیل  
عیونک من تصومه  
الصبح فاطرته  
خلص کلبی

بعد ما يحمل التشطيب  
جرح وحلوگ صبره  
ابشوگ شاربته  
اخافن باچر عکس  
مو نفس هذا اليوم  
وصبح للخلگ  
بحلوگهم نکتہ

## باب الجرح

(مهداة الى امام المتقين علي ابن ابي طالب عليه السلام)

لايمت الجرح  
فز وهدالي اجروح  
من شفت السمه  
كلّه انكلب دمعہ  
اداور همّي  
عين اتشيل هم الناس  
وبواب الدمع  
لعيونہ امشرعہ  
فتحت اسرار گلبي  
اطشرن آيات  
السمه من اتصيح يالله  
ظلت طايعه امربعه  
توسلت الغلب  
لا ينشطر مرتين  
روحي تريد تلحگ  
صوته وتسمعه  
اذن نگلہ جدم  
بس تستحق دنياك  
والنگله الوراہه

اتضيع وتبلعه  
اي والله  
ياحي اودر ابجنان يدور  
غيمه أنه احسه  
امسودنه امفرعه  
لملمت الحزن  
ظلت تدور ابشوگ  
تتشلبه اعله عيني  
اتواسي وتودعه  
اگوم أنه احسه  
اتلوج ما تترتاح  
فزعه اتگوم  
دمعه اتحشم ابدمعه  
علمت الشمس تندار  
قوّه اترید  
چفك صار سيف  
وحکمتك لمعه  
لسان العرب  
واحد مايصير اثنين  
لسن عندك  
تفهم المختفي اطلعه  
ياباب العلم  
كل باب مية باب  
يانهج البلاغه

الكل بشر نشعه  
لبست المصايب  
ثوب اترف ثوب  
خليت الاشباح  
التنهزم صرعه  
اصحاب الكهف  
نامو ثلاث اقرون  
گالو يوم واحد  
صارن انتبعه  
سيفك يا علي  
انفگ الوزار البيه  
حضرن جف العداله  
اشمامشه ايوسعه  
يهندال الصبر  
عينك تبوس الغاع  
تصعد للسمه  
ورحمه السمه امولعه  
فدائي الصوت  
يلصوت يشگ الصوت  
من راد الظلام  
ابلا وعي يمنعه  
او هام المشت  
ما وهمت دنياك  
ظلت صامده

وصوت العدا اتشله  
لا هيت المصايب  
سيف يسبگ سيف  
وحنث كل السيوف  
السيفك اتشجعه  
اسد هذا اللقب  
مو من بشر مصنوع  
نزل من السماء  
وربك اموقعه  
ذو الفقار ميزه  
ويشتغل حلگين  
بلع كل السيوف  
الرادت اتبلعه  
وسمت التباره  
ابساحة الميدان  
ولهسه آثار زودك  
بيهم امسعه  
آمنت اول فتى  
اليكسر ظهر شيطان  
وسيفك للرساله  
ابكل وكت شمع  
لهب ما ظل لهب  
من ينحجي ابطاريك  
لإن حكمة الالهك

سيفك امصنعه  
فزت اول خليفه  
ورتلک قرآن  
محمد گالهه  
اوضي السمه يسمعه  
قصر وعي الجهل  
ما يآتمن بالله  
لعب شيطانهم  
فزعو فرد فزعه  
آيه ونحتمي  
ونشافه بيك انذور  
ومن اسمك الربك  
ينفتح مسعه  
ربيع الآخره  
وموضع ذهب وياك  
وانت المقتضي  
ما غيرك اتشفعه

(ضمنت لا فتى الا علي لاسيف الا ذو الفقار في القصيدة لو  
جمعت اول حرف من كل صدر بيت من القصيدة حتما  
ستجدها )

## چالي الفكر

اشوف امدد التاريخ  
بين اجدام طولك  
واصل البريتك  
اشوف الغاع ما تلاّح  
لأن دم الشباب اعليك  
صابغ لون خاچيتك  
مشيت وي الجرح ناطور  
تخاف من الجرح ينجاس  
ينصب فاتحه ابيتك  
تجفّن كل دمع من طاح  
ما ردت الدمع ينزاح  
يغسل ظلمك وصيتك  
لطمت وهاالظمنه وياك  
تگضي اشوكت لطميتك  
صفه الحال اعله حيل الناس  
نكطه ابجر عافيتك  
سكته ولا ونين وصوت  
لا صبح الكشف / فد يوم تاليتك  
نامت حتى الاقلام استوك  
ما تعرف دربهه منين  
خرسه ابجذب باليتك



تدربه الهم على الشارع  
باشا اعله اليتامه ابزود باشيتك  
سجد مثل البليّه وطاح  
بوس وشم حدر ليفوگ ناصيتك  
تطوّه وصار مو عفريت  
عگرب صار يحرس ليك بسطيتك  
ردم چالي الفگر چاليك  
ولا چن الفكر يهديك  
من عاب اعله هالمسطور تربيتك  
الخبز مثل الذهب سلطان  
ورعيد النفط هالمخبوص  
جوّه اجدامك ابيتك  
العراق امچور ومحتار  
شاييل ضيم باجيتك  
العراق من الصبح غباش  
يقره او جوه حاشيتك  
العراق الضيم ما يختاض  
يزعل لو لكف شيتك  
العراق / العراق  
لازم يوم يردس حيل  
يطلع ماي من بيتك  
عندما تفتحم مجسات الوعي  
فضاءات الابداع حتما ستنتصر

# متن الريح

الوطن  
هذا امتداده للحسين  
والحسين  
الماتدم من ضحه  
بالدم  
لأن جف الليل  
من باگه النهار  
رسم وجه حسين  
للامه علم  
فرق بين الظالم  
اليضحك وراك  
وفرق بين اليبجي  
ويحشم القلم  
اوهاي طن اسنين  
وتحد السنون  
امكشره وبرگابنه  
اتحط السهم  
موگد اليبجي  
وتهلهل بيه نار  
واحنه صفنه اتگول  
واحدنه صنم

وانت يا ابن العراق  
اشبيك ها  
ما تفرّق بالعدم  
والموعدم  
چان كل البيك  
شارع من ضواك  
والعلامه البيك  
لازم تُحترم  
چان كل البيك  
اكبر برلمان  
صعد متن الريح  
اول من قسم  
اشبيك يا ابن العراق  
اشبيك ها  
هم شبخت المستحه  
وبعت الذمم  
انه ما كلك  
خوذ وسلاح شيل  
انه اكلك شيل  
من وعي الامم  
كل مكان يگوم  
يتغير مكان  
وكل زمان اليجي  
يحتاج الهمم

ياالله شدو الحيل  
بشراع العقول  
بحر طامي  
ولازم انعبر البلم  
هي قسمه اتصير  
من تعب السنين  
تعبته الحرب  
ياهو اللي افتهم  
عصر سرعه  
الكون يتقدم امام  
واحنه تونه انحاول  
انثب القدم

# أول عيد

قصيدة تمتزج بين الرثاء والوجد  
عندما تكون الكلمات حبلً تتفجر القوافي وعندما تموت الجبال تنتحر  
الوديان  
هكذا قدر المبدعين حملوا الشمس على اكتافهم وغنوا انشودة الخلود  
مهدة لروح الصديق الأديب الشاعر كمال السعدون

اول عيد مر بيّه  
وشتل حزنك  
دمع فحطان  
افك عين الصبح رمده  
تفز الحضرتك أذان  
اخلي الروح مشتاكه  
وسرفن بلهموم اردان  
تچوم قاط فوك القاط  
يضم حدره المضم والچان  
وذاك الجان  
رمشه من النده يتانيك  
وچفينه صبر  
بيهن غنه اوجدان  
چف بيه القلم  
والچف الآخر طيب  
اوهنه اثينهن

بعمالهن ميزان  
يافرحه وتغلي افرح  
وياضحكه  
وتغلي اضحك  
وانا الفرحة من نهد فرگاه  
مازارت وجه انسان  
امشي اعله الرصيف ارتاح  
من تعب الرصيف  
انباگ هم تعبان  
اطير ابلا جناح ما طير  
اظلن مستحي وخجلان  
امد رجلي  
اعله طول اغطاي  
اهسينه صلب ما لان  
يادوب النفس نجاد  
ماخذني ابسفر ماهان  
امشي والدرب  
يگلبنني حسبة ليل  
وهموم الدماغ  
اتگوم چف انسان  
ياكاف الكوامل  
تسكت انت شلون  
والسكته خذت  
من عندك اقوى السان

شدیت اعلہ روحک  
للتواضع روح  
رد نفس التواضع  
گام دگ اعلان  
ناعور الأدب  
یگلب ورق تاریخ  
وناعورك دمع  
یتمشه بالبستان  
او زائد قصیده  
دمک اتواسیک  
تتبرع ابدمها  
لو چنت حزنان  
یمیزان الذهب  
اندھلی المسویک  
چف کامل بحر  
والعشره هته اغصان  
هفن عالقوافي  
وخضرلها اجناح  
من صدر القصايد  
فصللها اعنان  
یادمعه وتظل  
محتاره حد الشوف  
تبني وي الحزن  
طوفان بالطوفان

خيعونه الفرات  
الشابك كل يوم  
وخيوط الصبح  
لبسها الك تيجان  
رغم الماي  
يلطم روج وي الروج  
بس ظل ابغياك  
م محل وعطشان  
دخلت انعاش طفك  
والنفس مگطوع  
رسم وجهك خريطه  
والالم عنوان  
آذان الناس تطرب  
والموسيقى اشكال  
وكتابك ظل حزين  
الچان سلطان  
حسبت احساب موتك  
من يجيك يموت  
شبه الموت عايش  
من چنت سفان  
هضمت الجوع چلمه  
والقراءه ادور  
اذن اصل الكتاب  
اليوم خسران



كَلْبَتِ اَعْيُون  
نَجْمَ اللَّيْلِ فَانُوس  
تَدَوَّرُ عَالِحَقِيْقَه  
اَبِيْنَ اَلَالُوَان  
تَسُوْلَفْ بِالطِّيُوْف  
اَلْبَانِيَهْ اَعْشَاشْ  
اَثَارِي اللَّيْلِ  
فَزْ اَعْلِيْكَ حُلْمَان  
اِذَا النِّسْيَانُ نَعْمَه  
وَالْاَمَلُ مَوْجُوْد  
نَظْلُ نَقْرَهْ حَيَاتِكَ  
حَتَّى لَوْ عَمِيَانْ

# مقارنة

انت مين وآنه مين  
انت من عرج الخباثة  
النبت فوگ الماي طين  
وآنه جذري  
انت تدري  
عاش من صوت الضمير  
صوت رب العالمين  
انت من تترس شليلك  
هاي حسبالك گضت  
مشت ما ترجع قضيه  
وصحت حتى اعله ربعك  
سالمين سالمين  
خايب شويه گلبهه القضييه  
اصفن وداور حياتك  
وشلع گفاك واقره زين  
انت من تفحص سلوكك  
تلگه بي مليون عاهه  
اتزاوجن واولاد عدهن  
كالشياطين  
خل اذكرك  
آنه من اگلب جدم

ينطبع وجه الوفاء  
ويرسم وجه الحنين  
وتنقلب بيهه فرحتي  
اجناح طير  
وللاخوه امسييرين  
اتعلمت اغسل دمعتي  
حتى اشوف الدمع  
ما يكذب عليه  
وحتى اقره عيون غيري  
وحتى اعرف المستحي  
من الكاويله  
وعلمت خزرات ربعي  
من يطحن  
اعتبرهن سرسريه  
وهاي هيه  
المجتمع في ذيل عمري  
الموجه عنده اتغيرت  
والجاذبيه  
وهاي هيه  
اشماتسوي الدنيه بيه  
انه اظل مصراع يفتر  
ما تچتف اللو ايديه  
انه احساسي اورقتي  
قلمي يبجر في هواه

ما تدنسه الرديه  
تكبر ويكبر صدره  
وينفتح نهر المحبه  
تلعب وترجع صبيه  
وهاي هيه  
احنه في عهد الشوارب  
وهذا ذيب واخو خيته  
وذاك زلمه وخوش زلمه  
احنه في ساحة نزال  
اليرده المستحه  
ولا بيه رحمه  
الوعي والله خطيه  
عزل ولا بس عباته  
حتى لا تكفيري يشوفه  
ويعتبر ويّاه خصمه  
وخصمي من يهد عليه  
بيدي اقطع نفسه كلّ  
ولا اخلي يشمله نسمة  
آنه العراق  
فكك اسمي وببيدك افحص  
تلغه بي كلشي وكلاشي  
الغيره طابو امفصله  
بس اعله اسمه  
آنه العراق

سالت ادموعه نهر  
دجله وفرات  
ابخت من صار  
عكازة قتل  
موت يزرع  
من اجل يستاف دمه  
اتكلي اصبر تنتهي  
وينگص جذره  
لشوكت اصبر  
والصبر صياد  
غافلني اعله سهمه  
الدهر شيريد ناصب شلمني  
وحس شريان گلبي شلمني  
ابدماه اعضاي كلهه شلمني  
اجيت ازخوف مامش حيل بيه  
سياسي اللي ثبرني  
الما يعرف اشلون  
يندار اعله طوله  
والضمير اللي يحمله  
يشرع ابوابه ابسهوله  
والطامه الكبرى  
اذا الجلسات صارت  
الصفير يحسب حموله  
ومن تمر

تتراكم الايام زحمه  
وماكو رحمه  
من يبيع عيون شعبه للحجوله  
وشحجوله  
انأسس احنه  
كل ميادين القتال  
گص رؤوس  
الموت تفصال اعله طوله  
انسود اوجوه التواريخ النزيهه  
حتى ما ترجع اصوله  
هاك اخذ شكبان  
اموال الخزينه  
اتروح فدوه الكل دواوين الحموله  
هز چتف ورداف  
ونصر من اجوك وهاي هيه  
احنه من الله النصر مكتوب  
ما غيرنه حوله

## عين الشمس

لو ما ضواؤه الشمس  
ما تتعرف  
وليله النجم ما فارغ  
احضان السمه  
والظلمه ماتمشي  
سوه وي الضوه  
ولا مرّه عين اشتهدت  
طور العمه  
الموس من يبلع  
شفرتة الشعر  
يضيع حلگ الحيل  
منه يقاسمه ، ومن ينكسر  
ظهر الجرح بي دوه  
اتگوم العوافي اتگوم  
تنصب ماتمه  
وانت ياكوكب  
غريب ابلا حزن  
لاذ بيك الجرح  
لا بيك احتمه ، ولا مرّه طاحت  
دمعتك وي الدمه  
ولامرّه جيبك  
طار لوهب الهوه

ولا ساعه تذكر  
بالزعل متخاصمه  
احنه الزعل  
وي الجرح يصبح امل  
تتمرجح اصوات الشعب  
بي ملحمة  
وجهي من يحضن صوركم  
ظل يدور ، ظل يدور وأنه دور  
ابوجه غيري  
اوجه غيري  
ظل يدور ابطل مصيري  
انه اوصيه  
اعله وجهي واستغيث  
ما يهمه  
او هو وصاني اعله غيري  
من قفل عيني دربكم  
من يطيح  
ومن تطيح اعيوني  
مفتاح الدربكم  
اجدامي تندهكم  
حوافر وي مسيري  
وظل يدور وانه دور  
ابوجه غيري  
حكمة الساني



محطه ابلايه ناس  
ومن صفتي  
اتشوف ناس ابلا محطه  
والبشر تاكل شكله  
ابلايه روح  
ابلا ضمير الماي  
بالصخره تغطه  
العندي عدكم  
ما تغير من فكركم  
بس لعب بالساحه خطه  
ابلايه خطه  
ولا ركد مايه وصفه  
حتى انه اخبطه  
ولا قوانين اونظام  
اللي تربطه  
ولا طفل حتى انه اوجهه  
وانه ابسطه  
لاهي صعبه ولا هي سهله  
ولا هي غلطه  
العقل من ينسجن ماينعقل  
من البدايه ايگوم  
كل فكره يخرطه  
يصبح الشارع هويته  
وبي يغني

ودفتر الماضي  
 اعله متنه يصير جنطه  
 الدنيه من اتمد  
 نهـر لعيونهه  
 من الحزن تمطر  
 بواچي ابلا دمع  
 تتحد اصواتهه  
 ابصـوت الفقير  
 تتشلبه حيطان  
 السفر ما تنسمع  
 لا مسه العدهه  
 اليسرني اولاً صبح  
 اولاً نهار اوليل  
 عـدهه الينبلع  
 وبنادم جثيره اطباع  
 تولد من طبع  
 طبع يفزع بيه  
 لو تفـزع ربع  
 او طبع يتّجه  
 اعله روحه ابلا ضلع  
 ومن يخاف اتصير  
 خطواته سبع  
 او من يشد  
 وي الوكت لو شد عليه

يصير شريانه  
حبـل ما يـنـگـطـع  
بس وجه ثاني  
لبس من ينصدع  
ايدوس گلب المستحه  
او ما يردع  
ما يفرق بين صبخه  
اوطين حري  
وين ما راد الحجي  
بي ينزرع  
وطبع بي ينشطر  
مية طبع  
نهر يركض  
بس وراه ما ينطبع  
عين دنيه  
ومن تظمهه اتصير عين  
ميت عين  
التمشي غفله  
اوميت عين التولد  
او ماتنكطع  
خلي عينك  
تشبح ابعين الشمس  
وصبر دقايق  
حلـهـه من كـونـك سـبـع

# صوغه عوافي

مهداة الى المعلم في عيده الاغر

يالون الشتا  
ومسحة حزن مهيب  
يازحمة قصيدة الجايه اتوافيك  
ياصوغه عوافي  
الكل أذن تهواك  
صبت فوگ چالي  
المستحه وچاليك  
يانقطة يمين ، الغيرت ارقام  
شهگه اتصير ، لو رادت تهنيك  
ياعمق البعد  
بيك البعد مخبون  
ولا چلت حكمتك  
لو عدو يراميك  
وحده اتصيب منهم  
العشره منك راي  
والعشره كلهن  
صاحن ابطاريك  
لأن من تجبل مهنتك  
تختبر دنياك  
ومن اطيح دنيا  
اعمالك التبنيك

مهداة الى الشاعر الكبير عريان السيد خلف عند لقائي به سنة  
1986 في محافظة اربيل في شمال العراق...

## بذرة شوگ

الك رقه  
ابجفن نعان  
يرگص دوم چوبيه  
وخذ گلبي  
حمامة دوح  
يون ابليله گمريه  
الك والبيك  
ما يضيع  
من ذيچ الشواطي  
ودهله اللميه  
الشافك والتمعن بيك  
ترسم ذيچ الاهوار  
يشوف وجه الناصريه  
توالفنه وعرفنه  
الزين والشين  
وكلهه اتصيح  
يم عريان ماشين  
توذح بالبجي حسنه يعريان

وخلطنه الدمعه  
وي عذر المسافات  
تعذرنه ونسینه  
الچان ما چان  
وگزینه الليالي  
امسامرك بات  
طيف اتخيلك  
مو هزة اغصان  
حلم وتونسك  
تسيوره للجيات  
وعرفنه اطباع بيك  
ولذة السان  
ولمسنه العشره  
وي طيب الحچايات  
تظل مرسوم  
والينساك بذات  
طيف وتتباهه بيك  
الروح والعين  
وكلهه اتصيح  
يم عريان ماشين  
طفل وسمع شعر  
يرگص على الماي  
انسبت روي  
ابمحبتة شلون ما راد

يوم اتبشرت  
من جاني مناي  
التسولف بيه  
موش ابعيد هالغاد  
فزرع گلبي  
يدور هاي من هاي  
حضن واحة شعر  
مزهية الاوراد  
وصار اليوم  
نفس اليوم ميلاد  
شتل بذرة عشك  
لون البساتين  
وكله اتصيح  
يم عريان ماشين  
سرب اطيور  
زفتهن على اجناح ولن كاسر  
يمر بيهن بلطيوار يفرگهن  
نوايا الراح ما راح  
الوكت خله الزلم  
بالعيشه تحتار  
وصفه صوت اليغرد  
صوت منباح  
وصفه الساكن ابصفي  
اليوم موجار

علسة صبر بالروح  
ماظنتي ارتاح  
ونار افراكمهم  
تلهب بلكتار  
وحشم بالمشو  
عني وخلو دار  
گصو يوم ابعدو  
يامزنة الوافين  
وكلهه اتصيح  
يم عريان ماشين  
يعاب الله الوكت  
خصه ابهليام  
يفرگ نايبات  
الحال بالحال  
يمولح بالسهر  
عين الردي تنام  
يشوط الهم  
مناحه اتصير بالبال  
يصد يتفسرن  
بچفوفه السهام  
ولا خاطر كسر  
من گالو انشال  
ويگلبه انكسر  
مو كسرة الجام



مثل كسر الضلع  
وصواب چتال  
يوكتي انلوم  
بيك ابهاي مو راضين  
وكلهه اتصيح  
يم عريان ماشين  
تحية الشجرة الملجوم  
مرات خشوع ونحتشم  
وي وكتك الفات  
تحية الكل گلب  
ابيض ومفتوح  
اليحمل حسره  
ينشرهه مسرات  
وسلام اعليك  
من سالم يعريان  
يخليك دمع ويحزن الطيات  
وسلام السوگ والغراف  
مجراه يصب بوسات  
يحملك سلامات  
ويظل ذاك النبض  
شاخص للغناوين  
وكلهه اتصيح  
يم عريان ماشين

## بجي امسودن

نام بين اچفوف  
تطعن بالخناجر  
هذا حالك يلمتيم  
ابجي بلكي الشمس  
تطلع ليك باجر  
انزف اشمابيك حيل  
ابهيده انزف  
اصبغ اوراق الدفاتر  
چان بيتك كله يضوي  
وهسه وحشه  
وظلمه ليك  
واليزورك  
هلهلوله وصار شاعر  
لبسوك اهدوم سوده  
وچتفوك اچتاف نار  
كل حالاتك نزعوها  
لعبه صارت للزغار  
والمسامير الأصابع  
والأصابع لليضدك  
سوه بالتابوت دار  
شيعوك

ابسكته خرسه  
وهمه ميته  
اوجه كانت  
وفرشو ابدر بك دمار  
اتنادسو  
ضحكة شماته  
ويجي امسودن لليغار  
دفنو اوجوه القصيده  
ورددو نفس الشعار  
خل يولي الشاعر  
اليكتب شرار  
يارمح  
حيلك تمدد عالشمس  
وسفه ذاك الحيل  
راح ابلا وداع  
فگسو اعيون الحقيقه  
ونتفو ارموش السباع  
ضاعت الفكره من ايدهم  
ومن ايدهم كلشي ضاع  
جابلو حس اليضدهم  
باعو اصوات التحبهم  
ونكسر غفله الشراع  
ماتت الجلمه ابهواهه  
فزت الحيله ابرضاهه

ثبتو ناب الحچيهم  
بات صاحو كلشي طار  
ورددو نفس الشعار  
خل يولي الشاعر  
اليكتب شرار  
خله تمشي  
شلون ما رادو نزله  
هي حزورة طلايب  
ما اظن واحد يحله  
هي نبعة طيب حلوه  
لو ظفر واحد كذله  
هي غصبة كل مجاهد  
لو فهم واحد زعله  
هي هي  
اشماتمر يكبر حملة  
هي جبل المستحه  
وحبل الوكاحه  
عيب ما ترضه  
ابد واحد يذله  
هي انت ابكيفك انت  
اشماتسويهه يشاعر  
احديثه نعيانه وخجوله  
لو يطگ تسمع حمله  
القصيده شلون ما تنبت

يطغ يثمر شتلته  
القصيده الشاعر الربان  
والشائل حملته  
طبع واحد  
بالقصيده المانملته  
لو قصيده  
ترفع انجوم الثريا  
ابكل ضواها  
لو يصيح الغوث  
يا هو اللي جبلته  
لو تصير امسودنه  
وتمشي ابدر بهه  
لو درب تيهه  
غطاها ابفشله  
١٩٨٦

# أجتاف ظل

انت الهوه  
وانت الضوه  
ومامش ضوه  
بيتك بيك المستحه  
اشواك وهوه  
اتخيلت  
هلهوله عمري  
وما طوه  
مديت الك جفي  
اعله طوله وما روه  
چنت اظن  
صدرك وسيع وما يمل  
انه ادري اشبيك  
من لوعه ودوه  
انه ادري  
اشما تخلص بيك  
يرجعك دوه  
ادري ادري هواي  
لو ردت انه اعدهن  
چان سالوفه  
يزتني وزتهن

چلمه حفظتني الدفاتر  
وانت خطهن  
الياسبب هذا العذاب  
المر عليه الياسبب  
مو چنت  
غريبيل اغربل ما اچن  
مو چنت  
موزر على اجتافك ارن  
مو چنت والياچنت  
اظل الياچنت  
يلّي ما رابط مهرتك  
ضيعت حتى الرسن  
فوت جدامك  
چثيره العبرت  
اعله اجتاف ظل  
مو غريبه الضاع  
هم يلگاله خل  
ومو غريبه  
الشاف نور يشوف ليل  
ومو غريبه  
المايزل مره يزل  
بس غريبه  
الما يچور كل صفاته  
يعگد المره

وعلى الحلوه يفل  
هسه تسألني  
اشو مليت مني الماتمل  
لا ما امل  
لا ما امل  
روحي مشدوده الخيالك  
تنسحل  
انه ابقه وياك  
ضحكه وي الدمع  
ادري ادري  
اشگد صلف ما تتحمل  
مجنون المايحس  
بالصار بيه وما يهم  
واللسان اشماخطه  
يقوي العزم  
انه ماشي  
وي الظنون الماطلني  
امودع الله  
وخل اظلن بس اسم



## اقصور عشك

صو چي لولحتك بديه  
ويقتت ماييك لوله  
وشفت عينك ضوه عيوني  
وصدگيت اشماتگوله  
انت من الماكو شي  
وانت من الشي نگوله  
يلبنيت اقصور عشك  
فوك متني اكل سهوله  
وشجعيئك دوم امدح  
گلت بلكي اتصير شاعر  
ودار حولك وي حولي  
ودار شعرك وي حوله  
چنت اخرس بس تؤولمي  
وحلم عندك بس تنوله  
وهاي هيه ياصحبتني  
البيك ما خلاك تمشي  
والنقص بيك الرجوله  
يالله احذر من صديقك  
چنت غافلها واغني  
وليلي اطويه اعله طوله  
ولا اصدگ من يسولف

كَلِّي احذر من هذوله  
من شفت هيئة صديقي  
ابوحش كاسر  
رملت كل داخلي  
ابدمع البجوله  
( اسد علي وفي الحروب نعامة  
ربداء تجفل من صفير الصافر )

## بسله

نايم بين چفك مستحه  
هلهت ياصاح  
من حسيت بيهه تون  
يهلتندب عليمن  
حظي مثل الطين  
صبخه ولا يفيد وياه  
دوس ولا تبين  
مو اول من ركض  
ما طاح گلبي از غير  
صدگ من حچه  
ويحسبهبه خوه ويچن  
الليل وطيوفه  
التمر جرة عذاب  
طوه الحيل وجزاني  
وحزماي الحزن  
لوين تريد  
امشي وي الدمع  
دفان  
وترك من بگايا الروح  
شوغات وحسن  
بسله من العمر

طاحت خساره وحيف  
لأن احبايات غيري  
امجيشات من الحصن  
اخرس راي غيري  
وبيه ماي ونار  
اساسه من الرمل  
مبني عليه اللبن  
زهگت وشكبنيت الخجل  
حفنة موت  
الجح بالكلب  
يطلع خبيث وطرن

# جرح العافية

يجرح العافيه  
وخيطة المجانين  
فلا طاب الجرح  
منكم ولصواب  
كلبك صار مسكن للشياطين  
لهسه البيه بعده  
امشرع الابواب  
توكلنه وعلى التقدير ماشين  
فلا نوگ ابد جدام  
نصاب يا عذر المحنة  
البشچابين  
دم ينزف يحني  
اچقوف خضاب  
الك والراي صاح ابصوت  
مالين لو باطل علي  
يندار ونعاب  
وحشة ليل  
متخوف مجانين  
لعد وضح النهار  
يخاف الغراب  
فرش درب المحبه

الليل صوبيين  
وزرع فوگ المتون  
ابهّمه الحراب  
نزع جفن الشمس  
من دون تخمين  
گسفها وراد  
بس يصير طلاب  
اشترت چفن اليموت  
وهزة البين  
وگماط السمه  
اوگبرک يدولاب  
نزلت والحزن  
يطويها قاطين  
فرّح فوگ  
ظل صامت فلا ذاب  
طاحت عاليصب  
الضيم مرتين  
مرّه اعليه  
مرّه ابعتبة الباب  
لف روحه وتحزّم  
بيّه نصين  
دفن نفسه ابضمير المات  
چذاب

## جرح ثاني

چورت ليلك حزن  
وحشه مشتگاه الضواك  
وبيه نگاد النفس  
يشهگ ويركض وراك  
جدرت گلبي ابغذابك  
بلچي يستاف ابرضاك  
امطبره اجروجه الجبيره  
وهم جرح ثاني اشتهاك  
اوشبخ ليلك وي ليلي  
عني مدري اشتهاك  
لا اثر حظني اعله سچه  
ولا درب جاوبني سكته  
ولا عرف ياهو الخذاك  
وين انت ابيامكان  
يلوع گلبي المانساك  
وين انت ابيامكان  
شوف حال الدلاك  
وين لanas التخبرك  
عني وتگلك شجاك  
چنت مرجوحه وتهزني  
شلون ما ردت ابهواك

ليش ماتذكر هواك  
ليش ماتذكر صباك  
ليش ماتذكر لعبه  
وهذا جفي الالعباك  
شرد اگلک يلغفيت  
ابدمعه وكحه وطفراك  
لسان شامت دون داعي  
اتناوشك شو خلبصاك  
لابقه الخيط اليشدك  
نزعاك ولبساک  
هدوم غيري اتخيرتها  
ولا يردك مستحاك  
اوف ياخنغة عبرتي  
لو اهدھا اعليك هاك  
اتوجرت شفة امسودن  
من تغيضه اوحسباك  
فرفحت مذبوحه ترفس  
اتوسفت كل مشترك



# فشخة الجكاليت

طبع الشعر بستان  
بي اشكال  
والشاعر لزوم يصير  
بســــــــــــــــتاني  
الشعر موبس كلام  
اوقافيه او اوزان  
الشعر وجه الحقيقة  
مالبس ثاني  
احسّ چقك دفو  
بچفوفي باني ارواح  
وحسّ وجهك قصيدة  
اتخفف أحزاني  
السكته ذهب  
من ينحجي ابطاريك  
وصبر للحقيقة  
او لا تمل ثاني  
وثبت لا تهزك  
فشخة الجكاليت  
فشحات العوافي  
عمل انساني  
اخدود القصايد

من تجيهه اتشوف  
مطبوگه اوي حزنك  
حزن روحاني  
ومخالف حجيهم  
من كثر ما بيك  
لون الماي حچيك  
ما صبح ثاني  
اذن وقعنه كلنه  
اعله الحچي الماذيك  
معزه الخالفك  
مو فعل شيطاني

# خد الماي

اذكرني  
وخذ من عندي  
هاي وهاي  
ياسبتاح گلبي  
المارواه الماي  
يسنين العمر  
يلذبلاهه الضيم  
ومگالب گضاهه  
الليل بس وياي  
امد العين كوسر  
ونتجي اعله الروح  
وسنينك محطه  
وعاكساهه الراي  
اطشر مستحاي  
والعب انه وياه  
وسنيني جهنم  
داورت دنياي  
دليني اعله بابك  
ياكثر مفتوح  
يلقافل نصيبك  
وي نصيب اصباي

يانجمه وسمه  
مفروشه هاي العين  
خليني اذكرك  
يلنسيت ارباي  
يلعابر مهجتي  
اخياط فوك اخياط  
تخاف من الهمس  
كلك جدم بهداي  
صباح العيد وجهك  
من يمر طارق  
ياشمس العصري  
ابلون خد الماي  
ادور مشتهاي  
وانت عني ابعيد  
تعبني حزنك  
كلبي صار افياي  
تيهني العمر  
مفتاح اعمه وضاع  
يدور عالقفل  
ويصيح بي شرابي  
مطبوغه الحواجب  
مثل طبغة ليف  
لاگاع التلمني  
ولا اشوف اسماي

بولايه غريبه  
ولابسه الاطوار  
ياطور اليگضي  
ابچفه اصيرن ناي  
ما ادري القدر  
يفتل هوانه اردود  
ويفز عواطف  
نايمه من اسنين  
وواجه من ملامح  
وجهك المتعوب  
ايام الصبه ودموع هاي العين  
اظل واگف  
اجدامي تشيلني من الغاع  
وحس چف اليمين  
يصير بي چفين  
وحس چف اليسار  
من الجذر مشلول  
لان گلب اليحبك  
ينفطر نصين  
اذكر هوانه المستحي  
من الناس  
من يحضن الغاع  
عيون خجلانه  
وذکر الشارع

من يمر طارق  
كله يگوم شفه  
يبوسني اهاناه  
وذكر مواعيد  
الترف بالليل  
وگلوب ابابكم  
مكسوره بيبانه  
مو حتى الغمر  
خوفني ظل سهران  
ودموعه ضوه  
من اطيح نعسانه  
على گصر الطريق  
السالفه من اتطول  
مانهوه السوالف  
هي تهوانه  
بعد كل العمر  
ومدافع الايام  
وهموم البنت  
بعشوشه السانه  
تخورس مناطق  
بعيونه من تقراه  
من عرگة جبينه  
اتبين الوانه

## محتوى الكتاب

2	بطاقة الكتاب
3	الإهداء
4	الشاعر فى سطور
7	المقدمة
17	نهر الحياة
19	المدينة الشاعرة
26	نذر مذبوح
31	عين الزمان
35	علمنه المعلم
39	سفح عمرى
43	أصعب درس
47	نزيف الدم
51	باب الجرح
56	جالى الفكر
58	متن الريح
61	أول عيد
66	مقارنه
71	عين الشمس
76	صونة عوافى

77	..... بذرة شوك
82	..... بجى إمسودن
86	..... أجتاف ظل
89	..... أقصور عشك
91	..... بسلة
93	..... جرح العافية
95	..... جرح تانى
97	..... فشخة الجكايت
99	..... خد الماى
103	..... محتوى الكتاب